



Sarajevo, 16. 11. 2023. godine
MEDIJIMA

SAOPĆENJE ZA MEDIJE

Evropska komisija pozdravila usvajanje Zakon o organizaciji tržišta vina u BiH

Sedmi sastanak Pododbora za poljoprivredu i ribarstvo između Evropske unije i Bosne i Hercegovine održan je 16. 11. 2023. godine, putem video-konferencije. Sastankom su kopredsjedavali Slobodan Cvijanović, pomoćnik ministra u Ministarstvu vanjske trgovine i ekonomskih odnosa BiH, i Mary Teresa Moran iz Opće uprave za proširenje i politiku susjedstva Evropske komisije.

Članovi dvije delegacije su razmijenili informacije o trgovini poljoprivrednih proizvoda, ribe i ribljih proizvoda između BiH i EU i konstatovali nastavak pozitivnog trenda u obimu razmjene, ali i da podaci o trgovinskoj bilanci pokazuju kako BiH još uvijek bilježi deficit. Na sastanku se razgovaralo o mjerama podrške poljoprivredi i ruralnom razvoju u cijeloj BiH i postepenom usklađivanju sa zakonodavstvom EU. Predstavnici BiH su informisali Evropsku komisiju da je pripremljen Nacrt Strateškog plana za ruralni razvoj BiH za period 2023- 2027.

Evropska komisija je pozdravila usvajanje Zakon o organizaciji tržišta vina u BiH i pozvala bh. vlasti da što prije usvoje podzakonske akte u cilju implementacije ovog zakona, riješe problem naziva vina koja se preklapaju sa Republikom Hrvatskom i usklade propise kada je posrijedi zaštita nacionalnih oznaka geografskog porijekla. Od vlasti u BiH se, također, očekuje poduzimanje daljnjih koraka za pripremu poljoprivrednog popisa, kao i jačanje administrativnih kapaciteta i resursa s ciljem bolje pripremljenosti i postupnog približavanja zajedničkoj poljoprivrednoj politici EU-a.

Evropska komisija je upoznala delegaciju BiH sa promjenama zakonodavstva EU u pogledu sigurnosti hrane, veterinarske i fitosanitarne oblasti. Naglašena je potreba donošenja propisa na nivou BiH koji će biti usklađeni sa zakonodavstvom Evropske unije, kao i poboljšanje sistema higijenske, veterinarske i fitosanitarne kontrole i analize hrane, odnosno laboratorijskih kapaciteta i zapošljavanje stručnog osoblja. Članovi bh. delegacije su ukazali na pitanje radnog vremena fitosanitarne inspekcije u Republici Hrvatskoj koje utiče na poljoprivredne proizvođače iz BiH. Na sastanku se razgovaralo i o statusu zdravlja životinja u BiH, posebice u vezi bolesti afričke svinjske kuge, bjesnila i bruceloze, te o kontroli i zaštiti bilja, kao i o ribarstvu i akvakulturi.

Direkcija za evropske integracije